

Ma l'è inutile, speranze no ghe n'emmo.
O fæto o l'è: o piggiâ o lasciâ,
a meno che e vetture no e sponcemmo
no ne resta nint'ätro che pagâ.

Un'öa, 'n'öa e mäza, quante ne costiä?
Quante vetture transitiä in te n'öa?
E anche lì senza fâli troppo criä
a-i zeneixi l'han misso sotta a coa.

A lista a saia lunga da no dise
- te fasso grassia de multe e l'Accaseua –
ma l'argomento do Carlo Felice
beseugna prima o poi tiälo feua.

I professoï han de ruzze in sce-i strumenti;
i coristi se fan o gargarismo;
i responsabili fan öege da mercanti
e i dipendenti han crisi d'isterismo.

A situazion a l'è assæ pesante,
ätro gente a l'è a torsio e senza pan
e parolle, e-e scuse troppo tante
ma cose ne saia do do doman?

O teatro o l'è vitta pe-a çittæ.
No veuggio andâ a scavâ in te l'argomento.
Ma cose devan fâ 'sti desgraziae,
cantave a Tursci "la mia canzone al vento"?

Pensighe Marta, che i guai no son finii,
ti t'è comme 'na moæ con tanti figgi
che se ti lasci andâ e no ti l'amii
te sccieuppan sott'a-i pê comme i coniggi

che son quelli che oua ciamman "tombin",
quelli che tutto l'anno so' attappæ
e quande deurua te fan un gran casin
e s'allaga trei quarti da çittæ.

I riæ de Zena no son ricchi d'ægua,
son sott'a protezion de Giove Pluvio
che se ghe già e balle o l'arve o pægua
e i zeneixi se fan o pediluvio.

E i danni poi chi i paga? Pantalone?
Dinæ in te casce o Comune o no n'ha ciù.
Adotteremo "la legge del taglione"
se salva i groschi e i piccin l'han in to ...

Dulcis in fondo, parliö de San Pè d'Ænn-a
novello Bronx de-a Comunitæ Europea
dove a vitta a no passa, a se remenn-a
da Barabin a-i bordi da Crocea.

Risse, malemmi, smercio, delinquenza
streppe de "escort", scarmi de galea
che vivendo de sola prepotenza
portan terrò dove prima gh'èa

da gente onesta comme o pan de casa
ch'a viveiva de lou e serietæ,
e oua se veddan fâ tabula rasa
a-a faccia de l'onò e da dignitæ.

L'è poscibile che questa situazion
combattua comme Davide e Golia,
a no posse trovâ 'na soluzion
perché proppio i ciù forti han tutti puia?

Cosci vivan tutti amagonæ
Prexonnè derè a-e proprie porte,
co-a speranza che l'Autoritæ
a-e libere a-a fin da questa sorte.

E prima de serà me ven in mente
n'ätro cosa ch'a no vâ guei ben:
o stato vergognoso ed indecente
di nostri morti sotterræ a Stagen.

Queste en poche fregugge spanteghæ
che giorno pe giorno se becchemmo.
Pensighe Marta, mi no n'ho ciù coæ...
chiedo venia, so a voxè da çittæ.

Illustrazione

"L'alluvione in Campetto" da *Il libro bianco dei gatti* di Elena Pongiglione e William Piastra. Particolare.
Genova - A Compagna 1988.

